



JUDICIAL SYSTEM MONITORING PROGRAMME PROGRAMA DE MONITORIZAÇÃO DO SISTEMA JUDICIAL

Komunikado Imprensa :
Periodu : Outobru 2009
Edisi : Outobru 2009

MOSAUN CENSURA LA PASSA IHA PLENARIA PARLAMENTU NASIONAL

Loron 12 Outobru 2009 nudar loron historiku ba estadu Timor Leste ne'ebe foin primeira vez iha Parlamentu Nasional debate Mosaun Censura nee'be hato'o hosi Bankada oposizisaun FRETILIN no Aliansa Demokratika (AD) bazeia ba artigu 111 K.RDTL no artigu 134 regimentu interna Parlamentu Nasional nian. Kontiudu hosi Mosaun Censura ne'e kona ba libertasaun Arguidu MB ilegalmente hosi Primeiru Ministru (PM) Xanana Gusmao ne'ebe kontra konstituisaun, kodegu prosesu penal, kodegu penal no lei internasional sira.

Hatan ba Mosaun Censura ne'e iha Parlamentu Nasional, PM deklarata katak, nia asumi responsabilidade ba libertasaun Arguidu MB, ho razaun interese nasional, i prontu atu hasai ninia imunidade hodi kopera ho justisa. Fo mos razaun katak jurisdisaun Tribunal Distrital Suai laiha kompetesia atu detein ka julga kazu hasoru arguidu MB.

Argumenta mos katak, povo Timor Leste tomak agora dau-dauk la presiza justisa maibe presiza liu oinsa governu/estado hadia sira nia moris hanesan hadia estrada, ponte, fo ai han, eletresidade no seluk tan. PM iha nia Deklarasaun ba PN rezeita katak nia rasik la'os fo liberdade maibe transfere deit MB hosi prizaun Becora ba embasada Indonesia. Iha nia esplikasaun esplika mos katak "justisa sei la justu kuandu krime grave ne'ebe akontese iha 1975 la prosesa liu hosi dalan legal, i la justu mos kuandu ita (estadu TL) la akuza Estadu Unidus Amerika ne'ebe uluk (1975) fo kilat, amunisaun, aviaun funu ba Indonesia atu invade Timor Leste".

Iha plenaria nee mayoria deputadu hosi Bloku Aliansa Mayoria Parlamentar (AMP) fo mos sira nia apoiu deklarasaun politika ba chefe do governu kona ba razoes libertasaun MB nebe sai polimika. Atu haforsa argumentos deklarasaun husi PM, Deputadu Riak Leman (PSD) hatoo nia deklarasaun politika katak, "se' Tribunal halo julgamentu ba MB mos imposibel ba vitima sira ne'ebe mate tiha ona iha igreja Suai atu moris fila fali".

Esplikasaun sira husi PM hetan kritika maka'as hosi bankada oposizisaun sira (FRETILIN, AD, PUN), i sira deklarata katak laiha ona konfiansa ba governo AMP ne'ebe lidera hosi Xanana Gusmao. Iha sesaun votasaun ba Mosaun Censura ne'e mayoria deputadu hili kontra;(kontra 39, avavor 25, abstain 0). Nune'e resultadu votasaun la passa. Iha sesaun votasaun ida nee Deputadu Francisco Xavier do Amaral hosi ASDT

maka lakon nia votus tanba la tuir Plenaria too hotu. Plenaria ba Mosaun Censura ida nee presiza tempo kuaze oras 12, husi tuku 09:00 – tuku 21:50 tanba debates nebe klean no naruk no husu larifikasaun responsabilidade husi PM Xanana Gosmao konaba tanba sa maka nia hakat liu orgauns soberania Judisial nia poderes no kompetensias hodi hasai akuzado MB nebe maka komete krime graves hasoru ema lubuk ida iha Igreja Suai iha tinan 1999 depois de konsulta Popular.

Hare ba assuntus iha eventus importantes iha leten, JSMP nota no iha preokupasaun tebes ba deklarasaun PM ninian, tamba ne'e ho vontade rasik hakarak fo ninia hanoin ruma ba deklarasaun sira balun tuir lei.

Konkorda katak Tribunal Distrital Dili (TDD) mak iha jurisdiksaun eksklusivu ba krime grave ne'ebe akontese iha loron 1 Janeiru – 25 Outobru 1999, la'os TDS, bazeia ba Regulamentu UNTAET/25/2001 parte 9.1 & 2.

JSMP hare medida ne'ebe PM Xanana halo hodi hasai MB hosi prizaun Becora laiha fundamentu legal tamba la'os PM ninia kompetensia. Konstituisaun ka lei sira seluk mos la fo dalan ida ba PM atu hasai arguidu MB hosi prizaun preventiva, so tribunal deit. JSMP la hare ba termus *libertasaun* ka *transferensia* tamba dala ida tan PM laiha kompetensia hasai, liberta ka transfere MB hosi prizaun ba prizaun seluk ka hosi prizaun ba embasada Indonesia, sa tan embasada la'os prizaun maibe teritoria hosi nasaun embasada ne'e nian.

Lolos advogadu Maternus Bere nian antes loron 15 tenke hato'o rekursu bazeia ba artigu 300.1 KPP, ho materia inkompetensia TDS nian ne'ebe hala'o prosesu primeiru interrogatoriu hasoru ninia kliente bazeia ba artigu 27 KPP, atu nune'e desizaun ne'e karik sei hetan nulidade hosi tribunal rekursu bazeia ba artigu 103.1 (e) i nune'e kazu ne'e sei hetan julgamentu ka primeiru interrogatoriu foun fila fali hosi Tribunal Distrital Dili ne'ebe iha jurisdiksaun eksklusivu ba krime grave. La'os PM mak hasai, liberta, transfere deit MB tamba konsidera TDS laiha direitu jurisdiksaun ba kazu ne'e

JSMP hakarak deklarata katak ema hotu hotu tenke iha lei nia okos, la hare ba pozisaun, estatutu, ras no seluk tan, nune'e ho respeita tomak hakarak enkoraza Prokuradoria Jeral Republika atu hala'o lalais investigasaun ba kazu libertasaun, hasai ka transfere MB husi Prizaun Becora ba embasada Indonesia iha Faraol, Dili bazeia ba KP artigu 245.1, tamba PM rasik deklarata asumi responsabilidade i pronto hasai ninia imunidade bazeia ba konstituisaun artigu 114.

Atu hetan informasaun kle'an favor kontakto

Luis de Oliveira Sampaio

Diretor Ezekutivu JSMP

Enderesu Email: luis@jsmp.minihub.org

Landline: 3323883